

四庫全書

史部

欽定四庫全書

欽定續通志卷四百六十八

列傳

元 二十二

來阿巴齊

耨埒 伊蘇岱爾

阿嚙罕

安塔哈

索多 伯嘉努

李恒

來阿巴齊寧夏人父濟蘇和爾歸太祖選居宿衛繼掌

膳事憲宗即位大舉伐宋攻釣魚山濟蘇和爾建言請  
城重慶合州二城之間命將守之與成都舊兵相出入  
不時擾之以牽制其援師然後水陸東下破忠涪萬夔  
諸小郡出三峽下荆楚與鄂州渡江諸軍合勢則東南  
一舉可定諸將以其言為迂卒不用於是博選宿衛中  
材力可任用者以阿巴齊奉命往監元帥耨塔軍遏宋  
人援兵駐重慶下之銅羅峽宋都統甘順沅流西上乘  
舟來攻阿巴齊順流而進宋人力戰不能支退保西岸

明日復至阿巴齊率精兵緣崖而下宋人敗走殺傷數千人帝聞而壯之憲宗崩阿巴齊從其父倍道歸燕世祖即位問以川蜀之事阿巴齊歷陳始末誦其父前所言以對世祖撫掌曰當時若從此策東南其足平乎朕在鄂渚日望上流之聲勢耳至元七年南征襄樊發河南北器械糧儲命阿巴齊督運二日而畢十八年授益都等路宣慰使都元帥發兵開運河阿巴齊往來督視寒暑不輟河既開遷膠萊海道漕運使二十一年遼左

不寧授征東招討使阿巴齊招徠降附遠近帖然二十

二年皇子鎮南王征交趾授湖廣等處行中書省右丞

二十四年改湖廣等處行尚書省右丞詔四省

按安南國傳四

省江淮江西湖廣及雲南也

所發士馬俾阿巴齊閱視領中衛親軍

千人翊導皇子至思明州賊阻險拒守於是選精銳戰

於女兒關斬馘萬計進至交州陳日烜空其城而遁屢

遣使約降欲以緩我師諸將皆信其說久之軍乏食日

烜不降擁衆據竹洞安邦海口阿巴齊率兵往攻之賊

兵敗遁會將士多疫不能進而諸蠻復叛所得閬阨皆失守乃議班師選諸軍步騎命先啓行且戰且行賊據高險射毒矢將士裹創以戰諸軍護皇子出賊境阿巴齊中毒矢遂卒子吉遜平黎蠻有功官雷州路總管

耨瑒沙卜珠岱人祖博囉岱為太祖宿衛從太宗平金戍河南父丹達爾佐憲宗征阿蘇欽察等國有功拜都元帥歲壬子率陝西西海鞏昌諸軍攻宋入蜀癸丑與總帥汪特格立利州甲寅攻碉門黎雅等城乙卯入重

慶獲都統制張實是歲卒耨耨偉貌長身勇力絕人且多謀略常從父軍中丁巳憲宗命將兵萬人略地自利州下白水直抵夔門戊午還釣魚山引軍欲會都元帥阿多古等於成都宋制置使蒲擇之遣安撫劉整都統制段元鑑等率衆據遂寧江箭灘渡以斷東路耨耨軍至與戰斬首二千餘級遂長驅至成都蒲擇之命揚大淵等守劔門及靈泉山自將兵取成都會阿多古死諸王額布根與諸將托里台等推耨耨為長耨耨率諸將

大破宋軍于靈泉山蒲擇之兵潰進圍雲頂山城扼宋  
軍歸路其主將倉卒失計遂以其衆降城中食盡亦殺  
其守將以降成都彭漢懷綿等州悉平威茂諸蕃亦來  
附捷聞即軍中真拜都元帥冬帝進軍至大獲山耨埒  
發成都遣張威為前鋒水陸並進謀鎖重慶江以絕吳  
蜀之路縛耨資州之口以濟師千戶溫都爾率舟師而  
下耨埒將步騎而南鼓譟渡瀘放舟而東蒲擇之以兵  
分道要遮遇輒敗之耨埒至涪造浮橋駐軍橋南北以



杜宋援兵明年朝行在所還討思播二州宋將呂文煥  
攻涪浮橋時士馬不耐水土多病死有旨督戰不得已  
出師大敗文煥軍遂班師文煥以兵襲其後耨埒戰却  
之中統元年耨埒遣梁載立招降黎雅碉門巖州偏林  
闕諸蠻得漢番二萬餘戶未幾詔蘇克分西川兵及陝  
西諸軍屬耨埒鎮秦鞏唐古之地三年宋將劉整以瀘  
州降呂文煥圍之詔以兵往援文煥敗走遂徙瀘州民  
於成都潼川四年為劉整所譖徵至上都驗問無狀詔

繹之還至昌平卒子伊蘇岱爾

伊蘇岱爾勇智類其父至元十一年入見世祖以屬行  
樞密院和塔齊使習兵事後圍嘉定以三千人至三龜  
九頂山相地形勢敗宋安撫咎萬壽兵以功授六翼達  
魯噶齊既而嘉定三龜九頂紫雲諸城皆降從行樞密  
副使呼敦率兵徇下流諸城皆望風來附呼敦會東川  
行樞密院哈達圍重慶歲餘不下帝命副使布哈代將  
布哈將兵至城下伊蘇岱爾率二十餘騎攻其門宋都

統趙安出戰伊蘇岱爾三入其軍再挾猛士以出大兵  
四集斬首五百餘級趙安開門降制置使張珏遁追至  
涪州擒之捷聞授四川西道宣慰使加都元帥羅氏鬼  
國亦奚不薛叛詔以四川兵會雲南江南兵討之亦奚  
不薛遣先鋒阿麻阿豆等迎敵伊蘇岱爾馳入其軍斬  
之亦奚不薛懼率所部降

按經世大典載至元十六年  
羅氏國主阿察叛十七年討

之阿察遣阿忒阿麻至宣慰司自言無反意伊蘇岱爾  
等分兵三道攻會寧關亦奚不薛遣其部阿侯拒戰敗  
逃入山箐亦奚不薛及阿察俱遁伊蘇岱爾定議班  
師命將守之賊窮困至二十年乃納款事異本傳以

功拜西川等處行中書省右丞西南夷雄左都掌蠻得  
蘭右叛詔以兵討降之改四川等處行樞密副使烏蒙  
蠻陰連都掌蠻以叛詔以兵會雲南行院拜達勒進討  
伊蘇岱爾擒烏蒙蠻進同知四川等處行樞密院事成  
宗即位拜四川等處行中書省平章政事武宗時由四  
川遷雲南加左丞相南征叛蠻感瘴毒還至成都卒長  
子囊嘉特官至四川行省平章政事孫達實巴圖爾自  
有傳

阿嚙罕扎拉爾氏祖博綽事太祖為博囉齊數有戰功  
太宗即位從征隴北陝西身先戰士死焉父伊埒肯從  
皇子庫春南征累功拜諸翼軍馬都元帥統大軍攻淮  
東西諸郡戊午戰死揚州阿嚙罕襲為諸翼蒙古軍馬  
都元帥己未從世祖渡江至鄂而還世祖即位宗王額  
埒布格稱兵內向阿嚙罕以所部軍擊破之中統三年  
李璫叛阿嚙罕敗之於老倉口璫伏誅授都元帥至元  
四年從阿珠伐宋師次安陽灘逆戰宋兵敗之五年大

軍圍襄樊阿嚙罕守百丈山漫河灘兵累交宋不能師  
十年樊城破襄陽降十一年丞相巴延與阿珠會師襄  
陽遣阿嚙罕率諸翼軍攻郢復諸州奪郢州南門堡巴  
延阿珠欲取漢口渡江宋人以精兵扼漢口乃遣阿嚙  
罕擊沙燕堡遂入江取鄂州阿嚙罕略壽昌順流東下  
沿江州郡悉降十二年屯駐建康巴延受詔赴闕以阿  
嚙罕留治省事拜參知政事巴延還分軍三道並進阿  
嚙罕由西道趨溧陽攻破銀樹東壩至護牙山慶豐圩

連敗宋軍破建平縣進攻廣德軍獨松關宋廣德守張  
濡率兵來拒戰敗追斬之十三年宋以國降詔阿嘍罕  
同左丞董文炳率高興等攻浙東溫台衢婺處明越及

閩中諸郡降其運使提刑等五百人追襲宋嗣秀王趙

與擇至安福縣

按安福縣宋史作瑞安考宋二王紀景  
定間升福州為福安府溫州為瑞安府

元地理志福州路有福安縣然  
則安福誤也與擇宋史作與罕

與擇以軍三萬拒戰阿

嘍罕渡江鏖戰斬其步帥觀察使李世達生擒與擇及  
其將吏百八十人悉斬之泉州蒲壽庚降江南平以參

知政事行江東宣慰使十四年入覲進行中書省左丞  
俄遷右丞仍宣慰江東十八年召拜中書左丞相行中  
書省事統蒙古軍四十萬征日本行次慶元卒子軍子  
貝降襲貝降卒弟伊蘇岱爾襲

安塔哈痕都斯坦人祖塔爾海巴圖爾驍勇善戰嘗從  
太祖同飲黑河水以功為千戶父布哈襲職卒安塔哈  
襲千戶從大帥烏蘭哈達征雲南身先行陣師還事世  
祖于潛邸至元九年命馳驛督諸軍攻襄陽十年襄陽



下第功授鎮國上將軍淮西行樞密院副使十一年築  
正陽東西城宋將夏貴乘淮水溢來爭正陽安塔哈率  
衆禦之貴走追至安豐城下而還拜中書右丞行樞密  
院事十二年渡江與丞相巴延軍合克池州師次建康  
宋鎮江攝守石祖忠遣使乞降揚州守將李庭芝聞之  
遣兵窺圍出擊安塔哈救之宋兵退走時真泰諸城尚  
為宋守鎮江城壁不固安塔哈乃立木柵以保居民又  
分兵屯瓜洲以絕揚州之援宋將張世傑孫虎臣帥舟

師陳于江中集山下其勢甚張安塔哈與平章阿珠督

諸軍破之宋殿帥張彥與平江都統劉師勇襲呂城遣

萬戶輝圖擊之斬彥克常州降平江嘉興十三年

按原傳降

平江嘉興以前諸事統叙于至元九年之下而以宋降為十二年事與本紀及巴延阿珠等傳俱不合謹按年次改正會兵臨安宋降詔與阿珠議淮南事宜淮南平授

平章政事行中書省事十五年召赴闕拜行中書省左

丞相移治臨安二十年遷征東行省丞相征日本遇風

舟壞喪師二十二年行同知沿江樞密院事二十三年

行江西中書省事入朝二十四年扈從征納顏師還奉  
朝請居京師二十六年卒追封順昌郡王諡武敏子阿  
里瑪累官江南諸道行御史臺御史大夫

索多扎拉爾氏驍勇善戰入宿衛從征花馬國有功李  
璫叛從諸王哈必齊平之還言於朝曰郡縣惡少年多  
從間道鬻馬于宋境乞免其罪籍為兵從之得兵三千  
人以千人隸索多為千戶命守蔡州至元五年阿珠等  
圍襄陽命索多巡邏奪宋金剛臺寨箇基窩青澗寨大

洪山歸州洞諸隘嘗猝遇宋兵千餘持羈勒欲竊馬索  
多戰敗之六年宋將范文虎率舟師駐灌子灘丞相史  
天澤命索多拒却之陞總管九年攻樊城索多先登城  
遂破襄陽降陞郢復等處詔討使十一年移戍郢州之  
高港敗宋師從大軍濟江鄂漢降十二年建康降參政  
達春命索多入城招集改建康安撫使攻平江嘉興皆  
下之十三年

按巴延傳巴延駐軍皋亭山乃十三年事此傳統叙於十二年內今據增 帥舟

師會巴延于皋亭山宋平詔巴延以宋主入朝留參政

董文炳守臨安以索多副之時衢婺諸州皆復起兵文  
炳使索多鎮嚴州衢婺徽連兵來攻索多戰却之復婺  
州敗宋將陳路鈴于梅嶺下又復龍游縣攻衢州拔之  
宋丞相留夢炎降攻處州及建寧府松溪懷安等縣皆  
下之十四年陞福建道宣慰使行征南元帥府事參政  
達春令取道泉州泛海會于廣州之富場將行信州守  
臣來求援曰今邵武方聚兵觀釁元帥旦往邵武兵夕  
至矣索多乃遣周萬戶等往招降之索多趨建寧遇宋

兵于崇安擊敗之宋丞相文天祥南劔州都督張清合  
兵將襲建寧索多夜設伏敗之轉戰至南劔敗張清奪  
其城至福州王積翁以城降攻興化軍破其城巷戰終  
日獲知軍陳瓚走解以徇至漳州先遣其子伯嘉努往  
會達春留攻之知府何清降攻潮州知府馬發不降索  
多恐失富場之期乃舍之而去十五年至廣州達春令  
還攻潮發城守益備二十餘日不能下索多令於衆曰  
有能先登者拜爵已官者增秩總管烏蘭噶爾先登諸

將繼之宋兵潰潮州平進參知政事行省福州入見帝  
陞左丞行省泉州十八年改右丞行省占城十九年率  
戰船浮海伐占城占城迎戰斬溺五萬餘人又敗之于  
大浪湖占城降復伐烏里越里諸小夷皆下之積穀十  
五萬以給軍二十一年鎮南王托歡征交趾詔索多帥  
師來會敗交趾兵于清化府奪義安關托歡命索多屯  
天長以就食與大營相距二百餘里二十二年有旨班  
師托歡引兵還索多不知也交趾使人告之弗信及至

大營則空矣交趾遮之于乾滿江力戰死事聞謚襄愍  
子伯嘉努

伯嘉努至元五年從元帥阿珠攻襄陽築新城數立功  
七年以質子從郡王哈達敗宋兵于灌子灘八年宋殿  
帥范文虎等督促糧運輸之襄陽伯嘉努順流出擊累  
獲戰功於是河南行省命為管軍總把後隸丞相巴延  
麾下擢為知印十一年按巴延傳伯嘉努從攻鄂州破  
金牛壩事皆在至元十一年今據從攻鄂州深入却敵身被數創攻沙洋及新城登城



力戰拔之巴延以功上聞世祖大悅從圍漢陽自沙燕

口原作沙武口今據巴延及阿爾哈雅傳改歸畫一曳船入江宋制置夏貴來

迎戰伯嘉努突入擊之宋兵潰遂登江南岸獲其戰船

器甲甚多未幾復攻破金牛壩十二年取雞籠洞還遂

至瑞昌縣遇夏貴潰兵復擊敗之是時宋遣兵救瑞昌

未至而縣已下矣圍江州宋安撫呂師夔以城降東定

池州擊宋平章賈似道及孫虎臣于丁家洲追逐百餘

里擒宋統制王文虎因定黃池略地宣州伯嘉努為前

鋒敗敵兵于喃呢湖于是太平州望風款附攻丹陽呂  
城破常州皆有功至蘇州宋守臣王安撫以城降秀州  
湖州皆不煩兵而下諸軍乘勝趨臨安宋主出降十三  
年領新附軍守鎮江未幾復從平章博囉罕攻泰壽二  
州中創遂罷攻後數日攻泰州新城力疾先登破之復  
被兩創已而從阿珠攻下揚州諸郡得宋制置李庭芝  
都統姜才以功陞管軍總管鎮高郵白馬湖徇地福建  
定衢婺信等州至新安擊斬宋趙監軍詹知縣擒江通

判鼓行而東沈安撫以建寧府降攻陷南劍州張清聶文慶遁去閩清懷安二縣傳檄而定至福州諭以威德王安撫率衆出降攻破興化擒陳安撫及白牒都統別擊東華鄉張世傑軍于泉州俄領諸軍乘戰船入海追逐張世傑于甲子門進至答關寨瀕海縣鎮悉招諭下之白望丹王虎陳以戰船三千餘艘來降宋二王遣倪宙奉表詣軍門降遂進兵至廣州諸郡縣以次降附明年春振旅還復攻下德勝等寨至蒲仙江聶文慶復敗

走攻潮州破之誅馬發等數人廣東遂平引由奉降表  
來朝未至授管軍萬戶七月朝於上都陞海外諸蕃宣  
慰使兼福建道長司宣慰使都元帥是時福建多水災  
伯嘉努出私錢市米以賑貧民全活者甚衆二十二年  
從父索多征交趾索多戰死伯嘉努遂與托歡引兵薄  
交趾境水陸轉戰戰輒有功二十七年除建康路總管  
武宗即位遷鎮江路總管至大四年金瘡發卒於家  
李恒字德卿其先姓於彌氏唐末賜姓李世為西夏國

主太祖經畧河西有守烏訥爾城者夏主子也城陷不屈死子惟忠方七歲求從父死主將異之執以獻宗王哈扎爾王留養之及嗣王伊遜克立惟忠從經略中原有功以為達嚕噶齊惟忠生恒恒生有異質王妃撫之猶已子中統三年命恒為尚書斷事官恒以讓其兄李璫反璫海恒從其父棄家入告變璫怒繫恒闔門獄中璫誅得出世祖嘉其功授溜菜路鄂囉總管至元七年改益都溜菜新軍萬戶從伐宋襄陽守將呂文煥時出

拒敵殿帥范文虎復援之恒築堡萬山絕其陸路文煥等又以漁舟渡漢水窺伺軍形恒設伏敗之水路亦絕遂進攻樊城十年恒以精兵渡漢自南面先登樊城破襄陽亦降十一年丞相巴延會師襄陽進至郢州宋以舟師截漢水巴延捨郢進攻沙洋新城留恒為後拒敗其追兵至陽羅堡宋制置夏貴遣其子松來逆戰恒先陷陳陂中流矢戰益力卒射松殺之夏貴敗走鄂州漢陽俱下遂從巴延東下十二年宋將高世傑復窺漢沔

乃遣恒還守鄂州時豪民聚衆侵江陵命恒討之恒諭使降得生口十餘萬悉縱為民仍禁軍毋得虜掠十三年從右丞阿爾哈雅至洞庭擒高世傑下岳州進攻沙市拔之宋制置高達以江陵降留恒鎮守傳檄歸峽辰沅靖澧常德諸州皆下未幾徙鎮常德以扼湖南之衝俄有詔分三道出師以恒為左副都元帥從都元帥蘇都爾台出江西開府江州師次建昌縣擒都統熊飛按宋紀云飛率兵巷戰兵敗赴水死與此互異遂圍隆興轉運使劉槃請降恒察

其詐密為之備樂果以銳兵突至恒擊敗之下撫瑞建  
昌臨江進攻吉州知州周天驥降遂定贛南安廣東經  
略徐直諒奉蠟書納其所部十四郡前江西制置黃萬  
石亦以邵武降隆興帥府誣富民與敵通已誅百三十  
家恒還審其非罪盡釋之宋丞相陳宜中及其大將張  
世傑立益王昰於閩中郡縣豪傑爭起兵應之恒遣將  
破吳浚兵於南豐世傑遣都統張文虎與浚合兵十萬  
期必復建昌恒復遣將敗之浚走從文天祥於瑞金又



破之天祥走汀州遣鎮撫孔遵追之併破趙孟潛軍取汀州遷江西宣慰使天祥復取汀州兵出興國縣連破諸邑圍贛州尤急或請發天祥祖父墳墓恒不許乃分兵援贛自率精兵潛至興國天祥走追至空坑擒招討使趙時賞降其衆二十萬有旨令與右丞阿里哈左丞董文炳合兵追益王衆謂宜趨福建恒曰若諸軍俱在福建彼必竄廣東則梅嶺江西非我有矣宜從廣東夾攻之衆以為然兵至梅嶺果與宋兵遇敗之乃遁走碣

州十四年拜參知政事行省江西十五年益王殂其樞  
密張世傑陸秀夫等復立衛王昺守廣東諸郡詔以恒  
為蒙古漢軍都元帥經略之恒進兵取英德府清遠縣  
敗其制置凌震運使王道夫遂入廣州世傑等移屯崖  
山時都元帥張弘範舟師未至恒分遣諸將略定梅循  
諸州凌震等復抵廣州恒擊敗之十六年弘範至自漳  
州直指崖山恒率所部赴之張世傑集海艦千餘艘貫  
以巨索為柵以自固恒斷其汲路其勢日迫諭降不可

乃擣其柵索絕世傑猶死戰弘範督諸軍合擊大敗之  
陸秀夫先沈妻子于海乃抱衛王赴海死從死者十餘  
萬人是日黑氣如霧有乘舟南遁者恒以為衛王追至  
高化始知衛王已死遁者張世傑也世傑繼亦溺死於  
海陵港

宋史張世傑傳  
作平章山下

嶺海悉平功成入覲帝賞勞甚

厚十七年拜中書左丞行省荊湖十九年乞解軍職乃  
命其長子薩滿達襲為本軍萬戶二十一年

據世宗  
紀補 詔

從皇子鎮南王征交趾結筏渡海奪天長府交趾遂空

其國航海而遁恒封其宮庭府庫追襲于海洋敗之會  
軍中疾作霖潦暴漲浸濯營地衆議班師恒弗能奪遂  
還蠻兵追敗後軍王命恒殿後且戰且行毒矢貫膝至  
思州毒發卒諡武愍追封滕國公子薩滿達江西行省  
平章政事囊嘉特章益都淄萊萬戶蘇都爾台同知湖  
南宣慰使司事

欽定續通志卷四百六十八

欽定四庫全書

史部

欽定續通志卷四百

六十九至  
七十三

編修<sub>臣</sub>謝振定覆勘

總校官原任侍講<sub>臣</sub>王燕緒

欽定四庫全書

欽定續通志卷四百六十九

列傳

元 二十三

徹爾

博果密

鄂勒哲

鄂爾根薩里

岳柱

徹爾楊珠濟達民曾祖塔沁為馬步軍都元帥從太祖  
定中原以功封徐邳二州因家於徐徹爾幼孤母富察

氏教以讀書至元十八年世祖召見悅之俾侍左右時有所咨訪從征東土還因言大軍所過民不勝擾宜加賑給帝從之賴以存活者衆擢利用監二十三年奉使江南省風俗訪遺逸時行省理財方急賣所在學田以價輸官徹爾止之二十四年分中書為尚書省價格為相引用黨與鈎考天下錢糧凡昔權臣阿哈瑪特積年負逋舉以中書失徵奏誅二參政行省乘風督責尤峻主無所償則責及親戚或連繫隣黨自裁及死獄者以



百數中外騷動廷臣莫敢言徹爾乃具呈僧格姦貪誤國害民狀帝怒謂其毀詆大臣命左右批其頰徹爾辯愈力帝大悟即命往籍其家得珍寶如內藏之半僧格既誅諸枉繫者始得釋復奉旨往江南籍僧格姻黨江浙省臣烏瑪喇默呼實都王濟湖廣省臣約蘇穆爾等皆棄市天下快之進拜御史中丞俄陞福建行省平章政事汀漳劇盜歐狗久不平引兵征之所過秋毫無犯有降者則慰遣之他柵聞之悉款附未幾歐狗為其黨

縛致於軍梟首以徇脅從者不戮一人汀漳平三十一  
年帝不豫徹爾馳還京師帝崩與諸王大臣共定策迎  
立成宗大德元年拜江南諸道行臺御史大夫尋改江  
浙行省平章政事江浙稅糧甲天下平江嘉興湖州三  
郡當江浙什六七而其地極下水鍾為震澤由吳松江  
入海歲久淤塞泛濫為患朝廷命疏導之徹爾董其役  
凡四閱月畢工九年按宰相年表大德十年二月至十  
月徹爾為中書平章政事與本傳  
不符今考姚燧所撰神道  
碑亦作九年則年表誤也召入為中書平章政事十月

卒追封徐國公謚忠肅至治二年追封武寧王謚正憲  
子多爾濟江浙行省左丞

博果密一名時用字用臣世為喀喇部大人康里即漢  
高車國也祖哈哩巴嘗事克呼王汗王汗滅即棄家從  
騎西北馳去太祖遣使招之莫知所之子十人皆為太  
祖所虜雅克章最幼太祖以賜莊聖皇后后憐而育之  
遣侍世祖於藩邸長從征伐有功世祖威名日盛憲宗  
將伐宋命以居守雅克章曰主上素有疑志今乘輿遠

涉危地殿下以皇弟獨處安全可乎世祖然之因請從  
南征憲宗喜即分兵命趨鄂州而自將攻蜀之釣魚山  
令額呼布格居守憲宗崩雅克章統世祖留部覺額呼  
布格有異志奉皇后稍引而南與世祖會於上都世祖  
即位雅克章未及大用而卒博果密其仲子也

姚燧撰  
神道碑

作元

命給事裕宗東宮師事太子贊善王恂恂從北征

乃受學於國子祭酒許衡日記數千言衡稱以為有公  
輔器世祖嘗欲觀國子所書字博果密年十六書貞觀

政要數十事以進帝知其寓規諫意嘉歎久之至元十三年與同舍生堅通塔塔圖魯等上疏歷陳前代崇儒興學之效請先於大都弘闡國學本人倫明物理然後續立郡縣之學求以化民成俗奏入帝覽之喜十四年授利用少監十五年出為燕南河北道提刑按察副使帝遣通事托克托護送西僧往作佛事還過真定蕐驛吏幾死訴之按察司不敢問博果密受其狀以僧下獄托克托直欲出僧辭氣倔强博果密令去其冠庭下責

以不職托克托逃歸以聞帝曰博果密素剛正必爾輩  
犯法故也繼而燕南奏至帝曰我固知之十九年陞提  
刑按察使二十一年召參議中書省事時權茶轉運使  
盧世榮阿附宣政使僧格言能用已則國賦可十倍於  
舊帝問博果密對曰自昔聚斂之臣如桑弘羊宇文融  
之徒操利術以惑時君始者莫不謂之忠及其罪稔惡  
著國與民俱困雖悔何及帝不聽以世榮為右丞博果  
密遂辭參議不拜二十二年世榮以罪被誅擢吏部尚

書時方籍沒阿哈瑪特家其奴張織扎爾等罪當死謬  
言阿哈瑪特家貲隱寄者多如盡得之可資國用遂勾  
考捕繫連及無辜京師騷動帝命丞相安圖集六部長  
貳官詢問其事博果密曰是奴為阿哈瑪特心腹爪牙  
死有餘罪豈可復受其誑嫁禍善良耶急誅此徒則怨  
謗自息丞相以其言入奏帝悟命博果密鞠之具得其  
實織扎爾等伏誅捕繫者盡釋之二十三年改工部尚  
書遷刑部河東按察使阿哈瑪特以貲財諂媚權貴貸

錢於官約償羊馬至則抑取部民所產以輸事覺遣使按治皆不伏及博果密往始得其不法事會大同民饑博果密以便宜發倉廩賑之阿哈瑪特所善幸臣奏博果密擅發軍儲又鍛鍊阿哈瑪特使自誣服帝曰使行發粟以活吾民乃其職也何罪之有命移其獄至京師審視阿哈瑪特竟伏誅托克托呼求欽察之為人奴者增益其軍而多取編民中書僉省王遇驗其籍改正之托克托呼遂奏遇有不臣語帝怒欲斬之博果密諫止



遇得不死二十四年僧格奏立尚書省誣殺參政楊居寬郭佑博果密爭之不得僧格深忌之因其退食責以不坐曹理務欲加之罪遂以疾免二十七年拜翰林學士承旨知制誥兼修國史二十八年徹爾等劾奏僧格罪狀帝問博果密具以實對帝大驚乃決意誅之罷尚書省復以六部歸中書欲用博果密為丞相博果密曰朝廷勲舊齒爵居臣右者尚多今不次用臣無以服衆帝曰然則孰可對曰太子詹事鄂勒哲可囊籍沒阿哈

瑪特家其賂遺近臣皆有簿籍惟無鄂勒哲名又嘗言僧格為相必敗國事今果如其言是以知其可也乃拜鄂勒哲右丞相博果密平章政事王師征交趾失利復謀大舉博果密曰島夷詭詐天威臨之寧不震懼歟窮則噬勢使之然今其子曰燔襲位若遣使諭以禍福彼能悔過則不煩兵而下矣帝從之於是交趾感懼遣其偽昭明王詣闕謝罪

按張立道傳載此事在二十七年其上表謝罪者則阮代之何維驥

二臣也與本傳互異敏珠爾丹請復立尚書省專領右三部博果

密庭責之事遂寢或勸征琉球及賦江南包銀皆諫止之價格黨人尼雅斯拉昂等既誅帝以實都長於理財欲釋不殺博果密力爭之不從日中凡七奏卒正其罪或言京師蒙古人宜與漢人間處以制不虞博果密曰新民乍遷猶未寧居若復紛更必致失業乃圖寫國中貴人第宅已與民居犬牙相制之狀上之而止有譖鄂勒哲徇私者帝以問博果密對曰鄂勒哲與臣俱代罪中書設如所言豈得專行宜使面質明示責降言者果

屈帝每顧侍臣稱蘇珠克展之能博果密問其故帝曰  
彼事憲宗常陰資朕財用博果密曰是所謂為人臣懷  
二心者今有以內府財物私結親王陛下以為若何帝  
急揮以手曰卿止朕失言三十一年

原文作三十年  
今依世祖紀補帝

大漸與御史大夫伊魯諾延太傅巴延並受遺詔留禁  
中遂定大策其後發引升祔請謚南郊皆博果密領之  
成宗即位躬攬庶政聽斷明果廷議大事多采博果密  
之言太后亦以博果密先朝舊臣禮貌甚至河東守臣

獻嘉禾大臣欲奏以為瑞博果密曰無益於民何足為  
瑞遂罷遣之西僧為佛事請釋罪人祈福犯法者皆賂  
之以求免有殺主殺夫者西僧請被以帝后御服乘黃  
犢出宮門釋之云可得福博果密曰人倫者王政之本  
風化之原豈可容其亂法如是帝責丞相曰朕戒汝無  
使博果密知今聞其言朕甚愧之因使人請之卿且休  
矣朕今從卿言然自是以為故事有奴告主者主被誅  
詔即以其主所居官與之博果密言若此必大壞天下

之風俗使人情愈薄無復上下之分矣帝悟追廢前命

執政奏以為陝西行省平章政事

按續通鑑云博果密為中書平章得與顧

命丞相鄂勒哲以其年位在下深忌之又云丞相以下多與議論不合奏以為陝西行省平章政事本傳及鄂勒哲傳俱未載附識於此太后謂帝曰博果密朝廷正人先皇帝所

付託豈可出之於外帝復留之竟以與同列多異議稱疾不出元貞二年拜昭文館大學士平章軍國重事辭曰是職也國朝惟史天澤嘗為之臣何功敢當此制去重字大德二年命行中丞事三年兼領侍儀司事有因父

官受賄賂御史必欲歸罪其父博果密曰風紀之司以宣  
政化勵風俗為先若使子證父何以興孝樞密臣受人玉  
帶徵賊不叙御史言罰太輕博果密曰大臣若加笞辱非  
刑不上大夫之義人稱其平恕四年卒武宗時贈魯國公  
謚文貞子和和陝西行省平章政事庫庫自有傳

鄂勒哲圖卜布延氏祖圖薩從太祖起朔方平諸部太  
宗伐金命太弟睿宗由陝右進師以擊其不備圖薩為先  
鋒破金兵於陽翟金亡從攻興元閬利諸州拜都元帥

取宋成都斬其將陳隆之賜食邑六百戶父錫津宿衛

禁中掌御膳

按錫津封秦益國公  
諡忠獻制見元史類

中統初從世祖北征

四年拜中書丞相與諸儒臣論定朝制鄂勒哲以大臣

子選為裕宗王府僚屬裕宗為皇太子署詹事長入參

謀議出掌環衛甚器重之裕宗薨成宗以皇孫撫軍北

方鄂勒哲兩從入北至元二十八年僧格伏誅世祖咨

問廷臣特拜中書右丞相既入相草僧格弊政請自中

統初積歲逋負之錢粟悉蠲免之民賴其惠三十一年



世祖崩鄂勒哲受遺詔合宗戚大臣之議啟皇太后迎  
成宗即位詔諭中外建議加上祖宗尊諡廟號致養皇  
太后示天下為人子之禮元貞以來朝廷恪守成憲詔  
書屢下散財發粟不惜鉅萬以頒賜百姓大德四年加  
太傅錄軍國重事位望益崇而處以安靜不急於功利  
故吏民守職樂業世稱賢相云七年卒追封興元王諡  
忠憲

鄂爾根薩里輝和爾人祖阿勒台薩里精佛氏學生奇

塔特薩里襲先業通經律論業既成師名之曰萬全至元十二年入為釋教都總統拜統制使卒子三人鄂爾根薩里其中子也以父字為全氏幼聰慧受業於國師帕克斯已既通其學且解諸國語世祖聞其材俾習中國之學於是經史百家及陰陽歷數圖緯方技之說皆通習之後事裕宗入宿衛深見器重至元二十年有西域僧自言能知天象譯者皆莫能通其說帝召鄂爾根薩里與論難僧大屈服帝悅令宿衛內朝會有江南人言

宋宗室反者命遣使捕至闕下使已發鄂爾根薩里入  
諫曰若果反郡縣何以不知言者不由郡縣而言之闕庭  
必其仇也帝悟召使者還械繫言者下郡治之言者立  
伏果以嘗貸錢不從誣之自是命日侍左右二十一年  
擢左侍儀奉御勸帝治天下必用儒術帝嘉納之遣使  
求賢置集賢館以待之命為集賢館學士兼太史院事  
士之應詔者盡命館穀之凡飲食供帳車服之盛皆喜  
過望有官於宣徽院者欲陰敗其事盛陳所給廩餼於

內前帝過而問馬對曰此一士之日給也帝怒曰汝欲使朕見而損之乎十倍此以待天下士猶恐不至况欲損之誰肯至者鄂爾根薩里又請立國子監置博士弟子員宜優其廩餼使學者日盛從之二十四年立尚書省僧格用事詔鄂爾根薩里與同視事固辭不許授尚書右丞繼拜平章政事僧格為政暴橫且進其黨與鄂爾根薩里數切諍之久與乖刺惟以廉正自持僧格奏立徵理司理天下逋欠使者相望於道所在囹圄皆滿

無敢言者會地震北京鄂爾根薩里請罷之以塞天變  
詔下百姓皆慶未幾僧格敗以連坐亦籍其產後知其  
無罪詔還之按世祖紀至元二十八年正月僧格罷二  
月始罷徵理司本傳所載恐失其實續通  
鑑云尚書省臣僧格及鄂爾根  
薩里以罪免所以深貶之也二十八年乞罷政事并

免太史院使詔以為集賢大學士司天劉監丞言其在  
太史院時數言國家災祥事大不敬請下吏治帝大怒  
以為誹謗大臣當抵罪鄂爾根薩里力爭之乃得釋三  
十年復領太史院事明年帝崩成宗在邊裕宗太后命

為書趣成宗入正大位又命率翰林集賢禮官備禮冊  
命明年加守司徒集賢院使領太史院事初裕宗即世  
世祖欲定皇太子以問鄂爾根薩里即以成宗對成宗  
及裕宗皇后皆莫之知也數召鄂爾根薩里不往成宗  
撫軍北邊帝遣奉皇太子寶於成宗乃一至其邸及即  
位語鄂爾根薩里曰朕在潛邸誰不願事朕者惟卿雖  
召不至今乃知卿真得大臣體自是召對不名賜坐視  
諸侯王等大德三年復拜中書平章政事十一年卒延

祐四年追封趙國公諡文定祖阿勒台薩里諡瑞愿父  
奇塔特薩里諡通敏並追封趙國公子三人長岳柱

岳柱字止所一字兼山幼穎悟有遠識既長就學日記  
千言年十八從丞相達實密備宿衛出入禁中至大元  
年授集賢學士即以薦賢舉能為事皇慶元年陞湖廣  
道宣慰使日接見儒生詢求民瘼至順二年累遷至江  
西等處行中書省平章政事時有誣告富民負永寧王  
官帑者中書遣使諸路徵之使至江西岳柱曰事涉誣

罔不可奉命僚佐重違宰臣意岳柱曰民惟邦本傷本以斂怨亦非宰相福也令使者以此意復命時雅克特穆爾為丞相聞其言感悟命刑部詰治得誣罔狀桂陽州民張思進等嘯聚二千餘衆州縣不能治廣東宣慰司請發兵捕之岳柱堅持不可遣千戶王英往諭以禍福賊曰致我為非者兩巡檢司耳我等何敢有異心諭其衆皆使復業一方以寧三年遷河南江北等處行中書省平章政事旋以軍事至揚州得疾明年冬卒岳柱



嗜經史自天文醫藥之書無不究極度量弘擴有欺之  
者恬不為意子三人長布達次願森次仁壽皆以仕顯

欽定續通志卷四百六十九

欽定四庫全書

欽定續通志卷四百七十

列傳

元

蘇克

囊嘉特

蒙古台

鄂囉齊

鄂勒哲圖

拜特穆爾

輝圖

伊克默色

貝降

博爾歡

巴圖

蘇克蒙古人父呼魯古爾國王穆呼哩麾下卒也後更  
隸塔海特爾格軍有口辨慎重不泄奏白機務往返未  
嘗失期太宗以為才賜名棟格矩憲宗時卒蘇克以壯  
勇居軍中歲甲寅命從都元帥特爾格和爾齊等入蜀  
乙卯萬戶劉齊格阿爾婁阿里與宋兵戰巴州陷敵中  
蘇克馳入其軍奪劉齊格等以歸戊午

按耨埒傳取劉  
整事在戊午歲

此傳統叙乙卯歲之  
後係脫誤今據增

從都元帥耨埒敗宋將劉整破雲

頂山城耨埒受詔會涪州至馬湖江蘇克夜渡江至行

在所陳道梗失期帝慰遣之未幾復自涪州入奏事遇  
宋軍於三曹山衆僅百餘奮兵疾戰敗之己未宋兵攻  
涪州浮橋部將和尼齊戰陷蘇克破圍出之又以白事  
諸王穆格所復敗宋軍於三曹山還至石羊與劉整遇  
復擊敗之中統二年命隸壽將軍至元三年從行院塔  
齊戰九頂山四年行省伊蘇忒爾署為本軍總管從取  
瀘州七年從伊蘇忒爾敗宋軍于馬湖江用平章政事  
賽音諤德齊薦遷行尚書省員外郎九年建都蠻叛詔

諸王鄂囉齊及伊蘇忒爾討之蘇克為先鋒破黎州水尾砦攻連雲關克之軍至建都戰於東山斬其酋布庫所過城邑皆下十年討碉樓諸蠻襲破連環城還敗宋軍于七盤山授新軍萬戶十一年真授管軍萬戶領成都高烏格等六翼及京兆新軍教習水戰伊蘇忒爾進圍嘉定蘇克率舟師會平康城修築懷遠等砦守其要害十二年行樞密副使呼敦等軍至與伊蘇忒爾會於紅崖遣蘇克守龍圪城中大震宋將陳都統鮮于團練

率舟師遁蘇克追擊溺死者不可勝計遂與中使沈達  
罕徇下流諸城紫雲瀘叙皆降進圍重慶蘇克以所部  
兵鎮白水馬湖江口十三年分兵五道水陸並進攻之  
衆軍不利唯蘇克獲戰艦三百艘涪州守將遺書納降  
蘇克往察其情偽至涪果降遂入其城重慶守臣張萬  
率衆來襲蘇克凡與十八戰斬首三百餘級萬敗走未  
幾復至又戰敗之十四年瀘州復叛蘇克從大軍討平  
之重慶受圍久其守將趙安出降制置使張珏遁蘇克

追破之以功授成都水軍萬戶尋改重慶夔府等路宣撫招討兩司軍民達魯噶齊十六年除四川南道宣慰使鎮重慶夔施黔忠萬雲涪瀘等州十九年亦實布希蠻叛以蘇克為宣慰使經理諸蠻二十四年降八番金竹百餘等砦悉以其地為郡縣二十九年入朝加都元帥改河東陝西等處萬戶府達魯噶齊三十一年僉書四川行樞密院事詔開土番道土番叛以兵圍茂州蘇克率師敗之元貞元年行院罷蘇克家居數歲卒子蘇



布特齊襲河東陝西等處萬戶府達嚕噶齊

囊嘉特柰曼人曾祖巴勒巴任其國位羣臣之右祖哈  
扎爾管帳前軍兼統國政仕至太師太祖平柰曼父穆  
徹來歸太祖命總管蒙古漢軍從世祖伐宋破額呼布  
格於實默圖從諸王噶必齊及庫庫岱平孛壇皆有功  
後以子貴贈太傅追封梁國公謚桓武囊嘉特幼從穆  
徹習戰陳有謀畧從阿珠下襄陽授漢陽千戶從丞相  
巴延攻復州敗宋兵於風波湖渡江後巴延攻鄂州阿

珠攻漢陽囊嘉特與張弘範等焚其蒙衝三千艘兩城大恐皆出降已延軍次安慶賈似道遣宋京來請和軍

至池州遣囊嘉特偕宋京報似道似道復遣阮思聰

經世

大典作素克已

偕囊嘉特至軍中仍請議和時暑雨方漲世祖

遣使令緩師已延阿珠與諸將議乘勢徑前遂進軍丁

家洲似道師潰大軍次建康帝聞囊嘉特親與賈似道

語召赴闕具陳其說遣還諭已延勿輕入敵境而大軍

已入平江矣宋使柳岳夏士林呂師孟劉岳等踵至皆

命囊嘉特同往報之師逼臨安復遣囊嘉特入取降表  
玉璽徵宋將相文武百官出迎王師宋主乃遣賈餘慶  
等同囊嘉特以降表玉璽至皋亭山已延遣令馳獻世  
祖還傳密旨遷宋君臣北上授安撫司達魯噶齊與阿  
嚙罕董文炳等取台溫福州尋領蒙古軍副都萬戶江  
東道宣慰使尋擢為都元帥管領通事軍馬東征日本  
未至而還詔守建康改拜雲南行省參知政事討金齒  
緬國得疾召還京師授南京等路宣慰使改河南道宣

慰使特旨命襲父職為蒙古軍都萬戶武宗在潛邸囊嘉特嘗從北征屢與海都戰皆有功尋以疾歸成宗崩昭聖元獻太后與仁宗在懷州太后召囊嘉特布琳濟達托音布哈巴爾斯台等諭之曰今宮車晏駕皇后欲立安西王阿南達爾等當毋忘世祖裕宗在天之靈盡力奉二皇子囊嘉特頓首曰臣等願効死力既至京師內外洵猶豫莫敢決囊嘉特獨贊諸王圖喇定計先發歸白仁宗曰事貴速成後將受制於人矣太后與仁

宗意乃決

按武宗紀和琳定策之先仁宗用右丞相哈喇哈斯謀遂言于太后決計誅阿固岱齊喇

等而迎武宗  
與此互異

武宗即位拜同知樞密事以旌定策之功

尋以老病乞骸骨不允仁宗即位以其家河南特授河南江北行省平章政事終其身封浚都王子嘉琿濟爾噶台孫托嘉世襲有位

蒙古台蒙古塔塔爾氏祖塔斯和爾齊從太宗定中原有功為東平路達魯噶齊位在嚴實上蒙古台事世祖至元八年改鄧州新軍蒙古萬戶治水軍於萬山南岸

以兵攻樊拔古城繼敗宋軍于安陽灘轉戰八十里禽  
其將鄭高大軍攻樊分軍為五道蒙古台當其一奪西  
南角入城命部將據倉粟功在諸將右十一年從丞相  
巴延平章阿珠南征命與萬戶實格會鹽山嶺遇宋兵  
蒙古台突陣諸軍繼進敗之自郢州黃家原盪舟入湖  
直抵新城鏖戰大敗之宋復州守將翟貴以城降乃率  
舟師至沙步

巴延及阿珠等  
傳俱作沙燕口

入江遇宋兵來拒進擊走

之次陽羅堡

原作武磯堡今据巴延  
及阿珠傳改歸畫一

宋將夏貴堅守不

下平章阿珠率蒙古台實格等雪夜泝流西上黎明至  
青山磯北岸宋將程鵬飛敗走夏貴奔黃州遂拔陽羅  
堡斬守將王達已延進次鄂州遣蒙古台諭降宋守臣  
張晏然及程鵬飛等乃留軍鎮鄂漢率諸將水陸東下  
十二年蒙古台諭斬黃安慶池州諸郡皆下之次丁家  
洲宋賈似道孫虎臣來拒蒙古台擊之奪虎臣所乘巨  
舟與宋降將范文虎以兵五百諭降和州及無為鎮巢  
二軍攻常州拔其木城宋降將趙潛叛於溧陽已延命

蒙古台擊之戰于豐登莊大捷行省第其功承旨授行  
兩浙大都督府事十四年改閩廣大都督行都元帥府  
事時宋二王逃遁入海蒙古台奉旨率諸軍與江西右

丞

索多傳  
作參政

達春會兵攻之次漳州諭降宋守將何清十

五年師還福州拜參知政事詔與索多等行省于福鎮

撫瀕海八郡召赴闕陞左丞十六年沙縣盜起詔蒙古

台復行省事討平之初蒙古台北還左丞索多行省福

建中書言其麾下擾民致南劍等路往往殺長吏叛帝



命蒙古台往招來七十二寨建寧漳汀稍獲安集十八年轉右丞時宣慰使王剛中以土人饒賢頗擅作威福蒙古台慮其有變奏移之他道二十一年拜江淮行省平章政事初宋降將陳義嘗助張弘範擒史天祥助鄂勒哲圖討陳大舉又助安塔哈征日本俱有功至是福建省臣言其有反側意請除之帝使蒙古台察之蒙古台攜義入朝保其無事且乞寵以官爵丞相巴延亦以為言乃授義同知廣東道宣慰司事二十二年以讒召

赴闕封其家貲按驗無狀未幾拜行省左丞相還鎮江浙時浙西大饑乃弛河泊禁發府庫官貨抵其直買粟以賑之二十三年奏以販鬻私鹽者皆海島民今征日本可募為水工從之二十五年詔江淮管內並聽蒙古台節制二十六年朝廷以中原民轉徙江南令有司遣還蒙古台言其不可遂止閩越盜起詔與博囉默色哈雅等合兵討之御史大夫伊蘇特穆爾奏宜選將帝曰蒙古台已往無慮也未幾志平之屢以病乞骸骨乃召

還二十七年特命為丞相兼樞密院事出鎮江西威德  
並著在官四十日卒蒙古台在江浙專復自用又易置  
戍兵平章布琳濟達言其變更已延阿珠成法帝每戒  
殺之既死臺臣劾郎中張斯立罪狀而蒙古台迫死劉  
宣及屯田無狀事始聞於帝云子三人特穆爾布哈布  
呼齊襲萬戶伊拉齊中書參知政事

鄂囉齊扎拉台人曾祖鴻和徹爾驍果善騎射太祖出  
征每為前驅祖舒爾罕有膽力嘗被讒不許入見一日

俟駕出趨前曰臣果有罪速殺臣不然赦臣願得自効  
帝笑而復用之辛未興金人戰于野狐嶺中流矢戰愈  
力克之還拔矢血出昏眩竟不起帝悲悼曰舒爾罕朕  
之一臂今亡矣父特穆爾台從太宗征喀喇部俘部長  
以獻復從征西夏有功特命行省事領魯噶莽果等五  
部軍平河南以功賜戶二千河南土人德之皆為立祠  
鄂囉齊性朴魯智勇過人早事憲宗特見親任戊午扈  
駕征蜀攻釣魚山至元五年攻襄陽授蒙古軍萬戶明

年襲父職領蒙古軍四萬戶十一年詔丞相巴延伐宋  
以所部從渡江圍鄂宋兵固守鄂囉齊白丞相遣許千  
戶同所獲宋將諭降守臣張晏然諸郡望風而靡十二  
年

據巴延傳增

分兵出獨松關宋將堅守鄂囉齊令益樹旗

幟於山上率精騎突之守兵驚潰棄關走十三年宋主  
降分討未下州郡詔行中書省參知政事未幾以參知  
政事行湖北道宣慰使兼領蒙古軍時州郡初附戍以  
重兵民驚懼往往逃匿山澤間鄂囉齊止侵暴恤單弱

號令嚴明民悉復業俄徵詣闕陞中書左丞行宣慰使  
十八年詔移行省于鄂宣慰于潭時湖南劇賊周龍張  
虎聚黨行劫隨宜招捕梟二賊首餘悉縱遣復召入見  
拜行省右丞二十三年拜湖廣等處行中書省平章政  
事命佐鎮南王征交趾至交趾啟王分軍為三因險制  
變蠻不能支竄匿海島餘寇扼師歸路鄂囉齊轉戰以  
出改江西行省平章政事二十六年以疾求退不允授  
同知湖廣等處行樞密院事大德元年卒追封鄭國公

謚忠宣子拜珠蒙古侍衛親軍副都指揮使托歡布哈

蒙古軍都萬戶

鄂勒哲圖

按原史別有鄂勒哲巴圖爾傳與此畧同蓋因賜名巴都爾而誤作兩人也今刪彼存此

欽察氏其先彰德人

原文作欽察人今據後傳增改

父哈喇和卓從憲

宗征討有功鄂勒哲圖驍勇而樂善歲丙辰以材武從

軍己未從攻鄂州先登受賞中統三年從諸王噶必齊

討李璫于濟南凡兩戰皆有功至元四年從萬戶穆呼

哩畧地荆南還至襄陽西安陽灘遇宋軍敗之既而從

平章阿珠圍襄樊水陸大戰者四勇敢出諸軍右十一年授彰德南京新軍千戶從丞相已延南征攻沙洋新城領丞相帳前噶必齊軍十二年與宋將孫虎臣戰于丁家洲大捷攻泰州戰揚子橋戰焦山破常州十三年入臨安下揚州皆有功江南平入見賜名巴圖爾授管軍總管高郵軍達噶噶齊十六年遷管軍萬戶漳州陳吊眼聚黨數萬劫掠汀漳諸路十七年命鄂勒哲圖討之加福建等處征蠻都元帥率兵以往時黃華聚黨擾



建寧號頭陀軍鄂勒哲圖先引兵壓其境懼而納款乃

聞于朝請與俱討賊朝廷從之制授華征蠻副元帥

按經

世大典云華敗自焚死事遂為前驅至賊所破其五寨

在至元二十年與此互異

十九年追陳吊眼至千壁嶺擒之斬首漳州市餘黨悉

平軍還授管軍萬戶高郵路總管府達嚕噶齊有虎為

害鄂勒哲圖射殺之二十二年拜江浙行省左丞遞陞

江西等處行樞密院副使成宗即位授江浙行省平章

政事大德二年卒追封林國公謚武宣子十四人皆仕

而特默圖奎蘇伯勒格圖尤顯孫二十四人仕者亦多云

拜特穆爾欽察人也至元中充哈喇齊入備宿衛以忠謹授僉左衛親軍都指揮使司事二十四年征叛王納顏隸御史大夫伊蘇特穆爾麾下敗納顏兵擒其黨金嘉努二十五年哈坦王叛從諸王柰瑪岱討之連敗其黨阿爾圖巴喇噶齊軍轉戰至特默哈必爾噶又敗之進至明安鄂倫城哈坦迎戰敗走追至特爾勒圖挺身

陷陣身中三十餘箭而還車駕親征哈坦拒王師拜特  
穆爾首戰却之獲其黨駙馬阿哩察二十六年師還復  
遣戍伊津大王之境海都謀擾邊命拜特穆爾以其軍  
先來行至吉魯爾河值布雅叛即移兵致討擒其黨已  
延以獻陞上萬戶二十七年哈坦復入高麗命偕徹爾  
特穆爾進討二十八年至鴨綠江與哈坦子羅丹戰失  
利帝命柰瑪岱色徹肯等征之仍命拜特穆爾為先鋒  
合攻哈坦敗之拜特穆爾將百騎追獲其妻孥哈坦尚

有八騎拜特穆爾止餘三騎再戰兩騎士皆重傷不能  
進拜特穆爾單騎追之至一大山日暮遂失哈坦所在  
二十九年間叛王伊奇哩尚在浩里倉拜特穆爾率兵  
進擊追至陳河伊奇哩脫身走遂定其地成宗即位俾  
仍其官車駕幸上京徵其兵千人從歲以為常云

輝圖諤嚕訥台氏祖額斯倫與太祖同飲黑河水從征  
遼東女真諸部復帥師討西夏大戰于哈喇哈扎爾擒  
夏主繼總軍南伐攻拔信安下宿泗等州諸王塔齊爾

以額斯倫年老俾其子布哈襲職中統二年布哈卒子  
幼兄子輝圖繼領其職李璫叛詔輝圖從親王噶必齊  
討之圍璫濟南璫夜出衝突輝圖直前奮擊璫退入城  
輝圖晝夜勒兵與戰破濟南誅璫噶必齊第其功居最  
詔領蒙古漢軍攻海州畧淮南廬州至元三年充邳州  
監戰萬戶四年領山東路統軍司從主帥南征至襄陽  
西渡漢江宋遣水軍絕歸路輝圖選士卒浮水殺宋軍  
六年次淮南天長至五河口與宋兵戰敗之七年詔守

鹿門山白河口一字城九年攻樊之古城堡奪之斬宋

將韓撥發擒蔡路鈴十年

据世宗紀及阿  
里哈雅傳增

襄陽降帥師

屯蔡息出巡淮安還城正陽畧地安豐十一年宋將夏

貴來改正陽輝圖逆戰退之十二年北渡至柵江堡值

宋軍與戰敗之復南渡江駐兵鎮江謀報宋平江軍出

常州遂領兵至無錫與宋兵戰殲其衆權樞密院事守

鎮江宋殿帥張彥安撫劉師勇攻呂城輝圖與萬戶呼

喇珠特穆爾追戰至常州擒張殿帥范總管從右丞安

塔哈攻常州宋朱都統自蘇州赴援輝圖遇于橫林店  
擊破之進取蘇州徇秀州仍撫治臨安迤東新附軍民  
十三年同元帥色埒默特穆爾張弘範徇溫州福建所  
至州郡迎降十四年授浙東宣慰使討台慶叛者戰于  
黃奢嶺又戰于溫州白塔屯寨轉戰至于漳泉興化平  
之十六年召至闕下授行省參知政事至處州以疾卒  
子巴噶岱爾官浙東道宣慰使都元帥平浙東建寧盜  
賊數有功布哈子呼圖克岱爾既長分襲蒙古軍千戶

從平宋有功累遷平章政事

伊克默色輝和爾人至元二年入備宿衛九年奉世祖命使海外八羅等國十一年偕其國人以珍寶奉表來朝十二年再使其國與其國師以名藥來獻十四年授兵部侍郎十八年拜荆湖占城等處行中書參知政事招諭占城二十一年召還二十二年復以參知政事管領鎮南王府事與平章阿爾哈雅右丞索多征占城戰失利索多死焉伊克默色言於鎮南王請屯兵大浪湖



觀釁而後動竟全師而歸

按經世大典及索多傳鎮南王班師在索多戰死之前與

此小二十四年使馬八兒國浮海阻風行一年乃至得

其良醫善藥遂與其國人來貢二十九年議征卓幹立

福建行省伊克默色與史弼高興並為平章詔軍事付

弼海道事付伊克默色仍諭之曰汝等至卓幹當遣使

來報其餘小國可招徠之軍次占城先遣郝成劉淵諭

降南巫里速木都刺不魯不都八刺刺諸小國三十年

攻葛郎國降其主合只葛當又遣鄭珪招諭木由來諸

小國皆來降卓幹主壻土罕必闕耶既降歸國復叛諸將議班師伊克默色欲如帝旨先遣使入奏弼與興不從按史弼高興二傳時土罕必闕耶既降乞歸易降表弼與伊克默色許之興深言其非後果殺使者以叛與本傳功罪互異遂引兵還以所俘及諸小國降人入見帝罪

其與弼縱土罕必闕耶沒家貲三之一尋復還之以平章政事為集賢院使告老家居仁宗念其屢使絕域詔封吳國公卒

貝降北庭人父呼圖克武勇過人由宿衛為南宿州鎮

將分守開縣後從世祖南征年幾七十每身先士卒戰  
功居多徙居大名路清豐縣封漁陽郡侯呼圖克辛貝  
降生甫數月母徐氏曰吾惟一子不可使不知學顧縣  
僻無良師友遂遣從師大名城守每朔望入學見  
貝降容止講解大異羣兒甚愛獎之比弱冠儀表甚偉  
丞相阿珠南攻襄陽江陵諸郡以偏裨隸麾下軍行至  
安陽灘宋騎直前突陣貝降引弓斃數人宋騎稍却復  
率衆戰敗之至元五年圍襄樊戰有功十一年從阿珠

渡江水陸遇敵嘗先登陷陣勇冠一軍宋平以功授江  
浙省理問官時事方草創省臣有所建白及事須奏聞  
者以貝降善數奏數令馳驛往咨于朝及引見世祖遙  
識之喜曰黑髯使臣復來耶其見器重如此二十七年  
遷江西行尚書省都鎮撫適徭獠擾邊從丞相蒙古台  
討定之二十九年遷慶元路治中歲大飢狀累上行省  
不報貝降即躬詣行省力請得發粟四萬石民賴全活  
元貞間兩浙鹽運使同知范某陰賊為姦侵暴細民人

咸側目貝降至官遂置范于刑時論多焉大德元年遷  
浙東廉訪副使令行禁止豪強懾伏同寅有貪穢者即  
抗章劾免之後陞工部尚書有能聲至大二年仁宗為  
皇太子奉皇太后避暑五臺貝降供給道路無有闕遺  
比至都改資國院使母徐氏卒遂奔喪于杭時酒禁方  
嚴帝特命以酒十甕官給傳致墓所以備奠禮初徐氏  
盛年守節教子甚嚴比貝降貴特旌其門貝降居喪盡  
禮延祐二年卒于家贈江浙左丞謚貞惠

博爾歡鄂約達勒之曾孫也年十六為本部斷事官從  
世祖討額呼布格數有功中統三年李璫叛命帥莽果  
一軍圍濟南分兵掠益都萊州悉平之詔錄燕南獄讞  
決明允皇子雲南王阿雅噶齊為其省臣保赫鼎毒死  
事覺將治其獄丞相錫津請以博爾歡往辭以年少帝  
乃以吏部尚書拜持檄爾輔其行未至保赫鼎密以金  
餽祈勿究博爾歡陽諾之至則竟其獄誅毒王者而歸  
其金子省陞見帝謂錫津曰卿舉得其人矣授右衛親

軍都指揮使會伐宋授金吾衛上將軍中書右丞詔分  
大軍為二右軍受已延阿珠節度左軍受博爾歡節度  
俄兼淮東都元帥罷山東經畧司而以其軍隸焉軍于  
下邳博爾歡頓大兵為疑兵以輕騎倍道襲海州東海  
石秋三城皆下清河亦降進兵拔淮安南堡戰白馬湖  
及寶應掠高郵自西小河及漕河抵灣頭斷通泰援兵  
遂下揚州淮東平益封桂陽德慶二萬一千戶至元十  
四年

原文脫至元字  
今据世祖紀增

討叛臣珠爾噶岱于德昌平之拜

中書右丞行省北京未幾召還時江南新附詔募民能  
從征者使自為一軍聽節度於其長博爾歡奏曰今疆  
土寢廣勝兵百萬何假此無藉之徒彼一踐南土則肆  
行俘掠恐叛者愈衆奏上帝大悟盡罷所募兵十六年  
以海拉蘇布爾噶蘇鄂喇昆諸部不相統命博爾歡監  
之十八年以中書右丞行省甘肅二十年拜御史大夫  
行御史臺事以疾歸二十四年

据世祖紀增

諸王納顏叛帝

將親征博爾歡曰徵莽果等五諸侯之兵足以當之何



至上頌乘輿哉臣請事東征帝乃命督五諸侯兵與納

顏戰敗之

按世祖紀載納顏叛帝自將征之巴延等其傳並云從帝親征本傳叙次恐有脫誤

黨塔布岱以兵來拒轉戰二日身中三矢大破之斬其

駙馬和倫適太師伊魯諾延大軍來會遂平納顏擒塔

布岱既而其黨哈坦復叛詔與諸王柰瑪台討之哈坦

死斬其子羅丹於陣凱旋授河南宣慰使改行中書省

拜平章政事時汴南諸州莽為巨浸博爾歡躬行決口

督有司繕完之成宗立遷陝西行中書省平章政事未

行留鎮河南近臣奏伐宋有功封高郵五百戶大德元年叛王永和爾烏魯斯布哈來歸博爾歡遣使馳奏請棄其前惡以勸未至帝深以為然命以平章政事行省湖廣會并福建行省入江浙拜江浙等處行中書省平章政事居歲餘卒加封泰安王謚武穆子昆都巴圖額森特穆爾博囉

巴圖幼穎異不以家世自矜長嗜書史大德五年擢江東道廉訪副使拜江南行臺侍御史累遷陝西行臺御

史大夫延祐元年拜甘肅行省平章政事甘州氣寒地瘠少稔歲民饑則發粟賑之春闕種則貸之於是兵饌既足民食亦給四年移江浙行省平章政事入為太子賓客上書陳正心修身之道帝嘉納之遷江南行臺御史大夫皇太后謂東宮官不宜使外止其行遂以疾辭去寓居高郵英宗即位陞見以疾固辭命以平章之祿歸養于家巴圖以所給祿歸有司泰定元年還京師卒朝廷知其貧仍還所辭祿妻鴻吉哩氏弗受曰始巴圖

仕于朝不敢虛受廩祿今歿矣苟受是祿非其意也卒  
辭之子多爾濟將作院判官

欽定續通志卷四百七十

欽定四庫全書

欽定續通志卷四百七十一

列傳

元 二十五

徹辰巴圖爾

奇奇哩

塔本哲爾

尼古爾

阿爾斯蘭

哈瑪爾圖

阿穆爾

博囉哈達

約幹實

摩哩

特默齊

巴圖爾

徹辰巴圖爾欽察人初事太宗掌牧馬從攻鳳翔戰潼  
關皆有功後從大將蘇布特攻汴京拔金人木柵於河  
南師還金將高都尉邀於路徹辰巴圖爾迎擊斬其首  
以歸從攻蔡州前鋒搭搭爾與金將戰金將捫其鬚徹  
辰巴圖爾進斫金將蔡州破金守將立城上以鐵椎擊  
殺之帝嘉其能命從皇子攻棗陽繼從宗王昆布哈攻

光州一日五戰光州下陞百戶從攻滁州與宋兵大戰  
至暮追殺之世祖伐宋募能先絕江者徹辰巴圖爾首  
應命率衆逼南岸詔與托歡同宋使諭鄂州使降鄂守  
將殺使者來襲奮擊大破之中統三年授蔡州蒙古漢  
軍萬戶宋人犯西平徹辰巴圖爾遜北踰淮至元二年  
由安慶入廬州聞宋兵至亟設伏于竹林擊殺之五年  
從元帥阿珠圍襄陽擊奪宋將夏貴米舟阿珠以其有  
功俾與扎拉爾引軍南下畧地淮東十一年遣招鄂州

十二年招滁州誅王安撫改管軍千戶十三年復畧地  
淮東獲其總管二人以獻遷滁州總管府達魯噶齊宋  
都統姜才率軍取糧高郵從史萬戶奪其馬及糧橐二

萬

按宋史姜才獲餉至馬家渡史萬戶將兵擊奪之史萬戶名弼事亦見弼傳

十四年從討

叛人珠爾噶丹于和囉海圖改滁州路總管府達魯噶  
齊十七年率其子托歡孫茂入見帝命以托歡為管軍  
總管茂為滁州路總管府達魯噶齊其後托歡以征倭  
及征卓幹功累陞鎮守無為滁州萬戶府達魯噶齊



奇奇哩幹爾喀氏太宗南伐以千戶從庫騰攻安豐壽  
州又從諸王塔齊爾攻荆山破之與萬戶魯爾台以兵  
守沂郟畧漣海又從元帥輝圖攻襄陽卒子桑噶蘇襲  
從丞相阿珠攻襄樊又從達春築正陽堡瀘軍乘艦來  
窺壁壘桑噶蘇率征騎逆之夾淮水而軍射死者甚衆  
至元十二年從御史大夫博囉罕平漣海秋九月從丞  
相巴延攻淮安南門破之又從元帥博囉罕築灣頭堡  
權領蒙古女真漢人三萬戶十三年

原文於十二年秋  
九月下突接夏五

月顯有脫誤今  
據世祖紀增

夏五月宋揚州都統姜才引兵來侵從

丞相阿珠襲制置使李庭芝及姜才于泰州皆殺之十  
四年加管軍總管累陞蒙古侍衛親軍副指揮使司事  
子尼古爾岱元貞元年為蒙古侍衛親軍百戶大德六  
年襲父職延祐四年陞左翊蒙古侍衛親軍都指揮使  
塔本哲爾蘇爾嘉氏太宗時以招討使將兵出征破信  
安河南以功授征行萬戶歲甲寅卒子塔齊爾龍衣已未  
率兵渡江破十字寨子重喜與敵兵戰于洋隘口奪戰

艦一流矢中左足勇氣愈倍世祖親勞之及塔齊爾卒

以重喜襲職

按原史別立重喜傳與本傳所載畧同顯係重出今刪歸本傳

中統三年

從征李璫有功至元二年築十字路城以脩守禦重喜率兵南巡為游擊軍四年從招布哈出征至泗州北古城時蔡千戶為敵兵所圍重喜奮戰救出之十一年宋兵圍正陽從戰敗之十二年從下連海諸城俄命率五千兵從出征與宋將李提轄等戰大敗之遂駐兵瓜洲十三年宋都統姜才圍城堡敗之從兵襲擊李庭芝等

于秦州十四年進婺州路總管府達魯噶齊未幾卒慶  
孫襲初授管軍總管二十四年領諸翼軍鎮太湖教習  
水戰征行上萬戶皇慶二年卒子布呼齊襲

尼古爾憲宗時與額哩頁烏蘇三十人來歸後從征釣  
魚山討李璫皆有功子阿都齊世祖時圍襄陽下江南  
敗實喇及征納顏皆以功受賞後事成宗武宗為扎薩  
固遜仁宗時歷官至左阿蘇衛千戶卒子嘉琿初為舒  
庫爾齊繼襲父職平必里克圖天歷元年從丞相雅克

特穆爾戰居庸北有功遷章佩卿子濟延布哈初事仁宗為舒庫爾齊天歷元年迎文宗于河南命為伊勒都齊往居庸關料敵道逢二軍謂特默齊曰今北兵且至其避之濟延布哈恐搖衆心即拔所佩刀斬之進兵部尚書領軍六百人迎敵通州會丞相雅克特穆爾至檀子山與圖們岱爾戰敗之遷大司農丞

阿爾斯蘭阿蘇特氏初憲宗圍其城阿爾斯蘭偕其子額森展迎謁軍門帝賜手詔命專領阿蘇特人以額森

展置左右道遇實呀格叛軍額森展力戰死之帝遣使  
裹屍還葬之阿爾斯蘭復以次子尼古爾獻帝命從烏  
蘇哈達征哈喇章有功又從伐宋中流矢死子呼爾敦  
岱爾充管軍百戶世祖命從博囉諾延使哈喇茂之地  
以疾卒子呼圖克特穆爾武宗潛邸時從征海都至大  
元年授左衛阿蘇親軍副都指揮使四年卒

哈瑪爾圖蘇頁氏憲宗時從攻釣魚山又從親王塔齊  
爾北征充千戶所都鎮撫後從托倫伐宋沒于陣子察

罕從塔察攻樊城西門領揚州等處游擊軍與宋兵戰  
有功至元十一年從呼圖克特穆爾攻江陵東南城堡  
又從阿魯罕敗宋兵于陽羅堡之南十二年分隸托克  
托總管與宋兵戰敗之又從攻獨松千秋撥出等關及  
諸山寨其降民悉綏撫之十三年授瑞安縣達魯噶齊  
始至招集逃移民十萬餘戶十四年陞管軍總把併領  
新附軍五百人從宣慰唐古特戰于司空山有功命以  
其職兼都鎮撫累陞至左翼屯田萬戶府副萬戶大德

五年卒子塔納襲

阿穆爾巴圖都喀喇氏初從蘇布特諾延征欽察攻河  
西城收西關破河南繼從定宗畧地阿努皆有功又從  
四太子南伐命充齊哩克昆阿都齊博克遜又從兵渡  
江攻鄂以疾卒于軍子伊蘇岱爾從討阿勒達爾琿塔  
哈征李璫伐宋累功授管軍總把至元十四年從攻福  
建興化招古田等處民五千餘戶以功授千戶又招手  
號新軍二千五百餘人陞總管二十年自願從征日本



進萬戶遞遷欽察親軍都指揮使二十四年從征納顏  
有功明年卒追封成武郡公諡顯敏

博囉哈達蒙古鴻吉哩氏祖安珠努太祖時率蒙古軍  
千人從諸王察罕台征河西攻下定會階文諸州以功  
為元帥駐軍漢陽禮店戍守西和階文南界及西蕃邊  
境父徹爾襲職從都元帥耜埒攻成都宋將劉整以重  
兵守雲頂山徹爾擊敗之進拔其城攻重慶徹爾將兵  
千人為先鋒

耜埒傳作以  
張威為前鋒

敗宋兵于馬老山諸軍還屯

灰山宋兵夜來劫營徹爾擊敗之世祖即位為鄂囉元帥改征行元帥至元二年以老疾不任事諸王阿濟格

命博囉哈達代領其事八年

按世祖紀咎萬壽攻成都至元九年

制授管

軍千戶宋將咎萬壽攻成都僉省嚴忠範遣博囉哈達將兵禦之流矢中頰戰愈力大敗其軍十一年行院汪

良臣

原作汪特格令据汪良臣傳改

以兵圍嘉定博囉哈達率衆攻九

頂山破之嘉定降進攻重慶宋軍突圍出博囉哈達追之斬首二百級瀘州叛還軍討之破寶子寨十六年取

重慶以功遷征行元帥二十一年命統蒙古特默齊軍  
從征金齒蠻平之都元帥蒙古岱征羅必甸博囉哈達  
率游兵先行江水暴溢率衆泅水而渡諸軍會城下先  
登拔其城遂屠之又從征八百媳婦國諸王庫庫命博  
囉哈達往招之不聽進兵攻之毀其北門木遂入其寨  
其地悉平授雲南萬戶府達嚕噶齊卒子孟克布哈襲  
管軍千戶

約幹實阿蘇特人父伊埒巴圖爾從其國主來歸太宗

命充宿衛從憲宗征蜀數有功嘗出獵遇虎於隘下馬搏虎抉其舌刺殺之帝壯其勇別立阿蘇軍使領之從世祖征額呼布格又從親王噶必齊征李璫俱有功授本軍千戶從下襄陽又從下沿江諸城宋洪安撫既降復叛誘其入城宴乘醉殺之長子伊蘇岱爾代領其軍從攻揚州中流矢卒約幹實襲為阿蘇軍千戶從丞相巴延平宋賜巢縣二千餘戶珠爾噶岱叛擊之斬其將其衆悉平諸王和琳及實喇等叛從皇子北安王討之

北安王戰失利陷敵陣中約幹實追至金山王乃得脫  
進前衛親軍都指揮使諸王納顏叛世祖親征約幹實  
為前鋒屢敗之擒納顏納顏餘黨塔布岱金嘉努聚兵  
茂諾海從大軍討平之既而哈坦復叛追擊其軍渡河  
而遁又與海都將巴林特爾格岱必瑠齊等戰屢捷成  
宗時在潛邸帝以海都連年犯邊命出鎮金山約幹實  
率所部在行從皇子庫庫楚丞相托多爾海擊海都軍  
突陣而入大破之復從諸王永和爾丞相托多爾海擊

海都將巴林敗之海都復以圖古木領精兵三萬據險來襲約幹實率善射者三百人守其隘注矢以射全軍而歸武宗鎮北邊海都復入寇約幹實敗之時扎爾古齊博囉特穆爾所將兵為海都困於小谷約幹實援出之武宗南還命約幹實後從敵懼莫敢近因留之戍邊從海都子徹伯爾等遣人請和朝廷許之遂撤邊備約幹實乃還大德十年卒子伊奇爾台襲

摩哩綽克台氏祖實里濟諾延從太祖與王汗戰同飲

班珠爾河水以功授千戶領徹爾台部征討諸國卒于河西父穆濟襲職從太宗定中原以疾卒摩哩襲職從定宗畧定欽察阿蘇俄羅斯諸國從憲宗伐宋有功世祖即位諸王呼琿叛摩哩與其弟僧格達喇率所部擊之一月八戰奪其所掠諸部民以還已而僧格達喇為呼琿所殺帝聞而憐之遣使者迎至摩哩賜號曰達爾罕尋卒子圖古勒

特默齊圖魯卜台人從諸王穆爾齊征蜀後以兵從塔

海幹布和爾齊耨埒諸大帥歲戊午耨埒攻涪州還軍至馬湖江宋兵連艦絕江不得進特默齊率精兵擊之奪其舟以濟又於橫江嘉定宣化三縣造浮橋以達成都耨埒以為能命從萬戶錫勒塔克畧地碉門黎雅土蕃錫勒塔克死行阮塔齊以特默齊為萬戶領其軍中統四年授蒙古漢軍萬戶至元九年從行省伊蘇岱爾征建都戰于梅子嶺大敗之復與左丞奇爾濟蘇乘勝進擊建都勢蹙請降十一年又從行院汪良臣

原文作特格誤



今据汪良臣傳改正

呼敦等攻嘉定重慶瀘叙諸州以功兼崇慶府達魯噶齊十九年卒子巴延襲蒙古軍萬戶戊甘州巴圖爾阿蘇特氏世居上都宜興憲宗在潛邸與兄阿索勒布爾罕及瑪達喇蘇帥衆來歸瑪達喇蘇從征穆克爾蘇城為前鋒將身中二矢奮戰拔其城又從征蜀至釣魚山歿于軍巴圖爾從征李璫圖濟南身二十餘戰世祖嘉其能命領阿蘇軍常居左右後從塔布岱南征與敵軍戰于金剛臺師還命充博克遜兼領阿蘇軍

至元二十三年授後衛親軍副都指揮使明年從征納  
顏擒金嘉努塔布岱以歸大德元年卒子巴濟拉襲至  
大四年河東陝西鞏昌等地諸翼衛爭草地訟者二百  
餘起命徃究之悉正其罪致和元年從丞相雅克特穆  
爾擒都爾蘇黨額卜德喀勒等領諸衛軍守居庸關及  
諸要害地按本紀泰定帝致和元年即文宗天歷元年  
也擒額卜德喀勒事在文宗即位之初故繫  
之致和元  
年之下天歷元年復從丞相擊旺沁兵敗之尋以疾

辭子伊埒圖襲



欽定續通志卷四十七